

EXPANSION DI BESTUURSKANTOOR, CENTRO HISTORICO BIRANDO UN REALIDAD



RESTAURACION FISICO Y SOCIAL DI ARUBA ANCRA DEN E PLAN NOBO BOARUBA

Den oranan di marduga di diabierna e flur di e construccion "Cocolishi" patras na Bestuurskantoor a wordo basha. Pa por a haci e construccion cu ta parti di e Centro Historico a traha un bunita diseño incorporando e edificio original cu a hera bay perdi si no tabata pa e boluntarionan cu a traha masha duro mes pa asina e shete ministernan awe por ta trahando eyden. Mesora tambe bou guia di Minister di Infraestructura Sevinger a start cu e plannan pa un edificio pega na esun original teneendo cuenta cu tur e regla y stipulacionnan cu ta regarda edificionan historico.

Diabiernamainta tempran Ministernan Eman y Sevinger a bin eynan pa mira con e trabou di bashamento di flur ta andando. Prome Minister a bisa cu e construccion aki ta haci e Bestuurskantoor uno mas funcional cu mucho mas espacio. "Esaki naturalmente ta forma parti di un vision mas grandi. Na momento cu nos a asumí nos responsabilidad como gobierno, nos a mira con centro di ciudad tabata den un decadencia grandi. Edificio di oficina di Impuesto, Bestuurskantoor, Corte, Watertoren y otronan. Mescos cu varios scol. Un deterioro hopi grandi".

Centronan di Ciudad y Barionan di Atencion


Un restauracion total di Centro di Ciudad ta loke e gobierno a tuma na su encargo. No solamente físicamente, pero tambe riba tereno social tabatin asuntonan cu no tabata anda bon y tur esaki ta hayando atencion completo awor di e Gabinete aki. "Nos a hincá tur nos energia den desaroya un plan cu a haya e nomber "BoAruba" cu ta encera desaroyo di centronan di Oranjestad y San Nicolas. Mescos tambe 21 barío na Aruba ta wordo drecha. Cu e trabou aki a cuminsa caba den algun barío y ta sigui pa otro barionan na Aruba". Eman a subraya cu ya na Juwana Morto y De Vuyst trabounan grandi a wordo haci caba.

Pa loke ta e hulpbestuurskantooran den cinco distrito na Aruba ta asina cu lo bin edificionan nobo cu ta bay acomoda e oficianan di censo auxiliar, pero tambe otro servicicionan manera esun di dokter di cas, un biblioteca chikito, sala pa reunion y mucho mas. E edificionan aki ta wordo yama "acomodacionnan multifuncional".

Un Prome Minister Eman cu masha pasion a papia riba e trabounan den centro di Playa acentuando un bes mas cu nan ta hopi grandi. "E ta yena nos cu alegría pa mira e revivencia cu ta bay tin den e centronan di ciudad. Cuminsando na e scolnan St. Dominicus College y La Salle cu ta actualmente bou di restauracion completo, un poco mas pasuit edificio di Corte cu tambe ta den restauracion completo, Watertoren cu a caba di wordo restaura y biniendo un poco mas pasuit ta haya henter caya grandi na unda un restauracion enorme grandi ta tumando lugar cu pa fin di e aña aki mester ta cla". E trabounan den caya grandi tabata tanto bou tera como riba tera y esaki a tuma mas tempo cu a pensa.



Gobierno di Aruba




Minister Sevinger - POCO POCO TRANSFORMACION DI NOS CENTRO DI CIUDAD TA HAYANDO SU FORMA

Minister di Infraestructura y Estranheria Benny Sevinger tabata presente den oranan masha tempran di diabierna mainta pa hunto cu Prome Minister Eman inspecciona e trabounan andando na e edificio anexo na Bestuurskantoor. E trabounan a yega na un punto importante: bashamento di e flur cu a tuma lugar den marduga.

Minister Sevinger "Nos ta hopi contento cu awe nos a yega na un punto esencial di e proyecto específico aki na Bestuurskantoor. E flur a wordo basha despues cu e fundeshi a wordo poni. Awor nos ta mira e heronan pa e columnanan y e murayan cu tambe mester wordo basha ainda y cu mester wordo bon midí". Sevinger a splica cu tur cos mester pas den otro, mescos cu ora ta traha un puzzle cu tur pida mester pas den otro pa e ta completo. "Pero e parti mas importante ta loke ta sosodiendo awor aki nan."

Minister Sevinger a aplaudi e trabou haci dor di Albo NV, e ingeniero y trahadonan cu a percura pa e trabou ta canando asina bon. "Nan ta traha masha bon organisa y cu un bon planificación. E tereno di construccion ta limpi ora nan bay cas atardi y mainta cada ken sa e trabou cu e mester haci e dia ey. Esaki ta keda reflichá den progreso di e proyecto".

E edificio cu a wordo diseña dor di arquitectonan Ponson y Hoevertsz ta den e forma di un cocolishi cu ta bay ariba, cu ta un entidad simbolico di e barío di Rancho. Un edificio moderno anexo na e edificio historico di Bestuurskantoor cu poco poco ta wordo renoba. E parti paden ya a wordo restaura hopi caba y e aña aki ainda ta spera cu esaki ta keda cla. Sevinger "Despues di caba cu e edificio nobo ta bay over na renobacion completo di e edificio bieu cu lo tye pa hopi aña mas pa futuro generacionnan. Te dia di awe nos no por caba di compronde con gobernacionnan a hincá den nan cabes pa bende e edificio aki. Ta mescos cu si pidi Obama pa bende Cas Blanco. Ta increíble cu un patrimonio di pueblo casi a wordo bendi dor di politiconan pa simplemente haci di dje un otro hotel mas. Danki Dios cu esaki no a sosode y awe nos ta aki trahando un edificio nobo di cua nos pueblo porta orguyoso di dje hunto cu e Plaza cu ta bay bin pariba di dje. FCCA a keda cla cu e compra di edificio di Tivoli cu ta bay bira un garashi grandi di parqueo y asina poco poco transformacion di nos centro di ciudad ta hayando su forma".



BOARUBA | ban renoba nos isla